


Ansenny ou zanfan



Ansenny ou zanfan

“*Ou devret kontan Zeova ou Bondye avek tou ou leker, avek tou ou nanm, e avek tou ou lafors. Sa bann parol ki mon pe dir ou ozordi, i bezwen dan ou leker; ou bezwen fer zot antre dan ou garson e koz lo la ler ou pe asize dan ou lakaz, ler ou pe marse lo semen, ler ou pe alonze e ler ou leve.*”

—DETERONNM 6:5-7.



Konteni

LESON		PAZ
1	En sekre ki nou kontan pour konnen.....	4
2	Rebeka ti anvi fer Zeova kontan	6
3	Raab ti krwar dan Zeova	8
4	I ti fer son papa ek Zeova kontan	10
5	Samyel ti kontinyen fer sa ki byen	12
6	David pa ti per	14
7	Eski par ler ou santi ou tousel e ou per?	16
8	Yosiya ti annan bann bon zanmi.....	18
9	Zeremi pa ti aret koz lo Zeova	20
10	Zezi ti touzour obeir.....	22
11	Zot ti ekri lo Zezi	24
12	Neve Pol ti brav	26
13	Timote ti anvi ed dimoun	28
14	En Rwayonm ki pou diriz later antye.....	30

En sekre ki nou kontan pour konnen

Eski en dimoun in deza dir ou en sekre?—* Labib i koz lo en “sekre” ki speyal akoz i sorti kot Bondye. I en sekre akoz dimoun pa ti konnen. Menm bann lanz ti anvi konn sa sekre. **Eski ou ti a kontan konn sa sekre?—**

En kantite letan pase, Bondye ti kre premye msye ek premye madanm. Zot ti apel Adan ek Ev. Bondye ti fer zot reste dan en zoli zarden ki ti apel zarden Edenn. Si Adan ek Ev ti’n obei Bondye, zot ek zot zanfan zot ti pou kapab fer later antye vin en paradi parey sa

* Dan sa bann zistwar i annan en laliny koumsa (—) apre serten kestyon. I en bon moman pour fer en poz e les ou zanfan reponn.

zoli zarden. Zot ti pou kapab reste dan Paradi pour touzour. **Eski ou rapel ki Adan ek Ev ti fer?—**

Adan ek Ev ti dezobei Bondye e sanmenm sa nou pa pe viv dan en paradi ozordi. Me, Bondye in dir ki i pou fer later antye vin zoli en zour e tou dimoun pou ere e pou viv pour touzour. Ki mannyer i pou fer sa? I ti en sekre sa. Alor, dimoun pa ti konnen pour en kantite letan.

Kan Zezi ti vin lo later, i ti koz avek bann dimoun en pe plis lo sa sekre ler i ti donn detay lo Rwayonm Bondye. I ti demann bann dimoun pour priye pour ki sa Rwayonm i vini. Sa Rwayonm pou fer later antye vin en zoli paradi.

Eski ou vreman anvi konn sa sekre?— Pa oubliye ki zis sa bann ki obei Zeova ki pou reste dan Paradi. Labib i rakont bokou zistwar lo bann msye ek madanm ki ti obei Zeova. **Eski ou ti pou kontan konn zot zistwar?—** An-nou vwar lekel serten parmi zot e ki mannyer nou kapab fer parey zot.

LIR DAN OU LABIB

Mark 4:11

1 Pyer 1:12

Zenez 1:26-28; 2:8, 9; 3:6, 23

Matye 6:9, 10

Psonm 37:11, 29

Ki ou krwar bann lanz ti anv konnen?



KESTYON:

- Akoz later pa en paradi ozordi?
- Ki sekre Labib i koz lo la?
- Ki Zezi ti dir bann dimoun lo sa sekre?
- Ki ou devret fer pour reste dan Paradi?


2

Rebeka ti anvi fer Zeova kontan

Rebeka ti en madanm ki ti kontan Zeova. Son msye ti apel Izaak. Li osi i ti kontan Zeova. Ki mannyer Rebeka ti zwenn Izaak? Ki mannyer Rebeka ti montre ki i ti anvi fer Zeova kontan? Annou koz en pe plis lo li.

Papa Izaak ti apel Abraam e son manman ti apel Sara. Zot ti reste Kanaan. Bann dimoun laba pa ti ador Zeova. Me Abraam ti anvi ki son garson i marye avek en madanm ki ador Zeova. Alor, i ti anvoy enn son serviter, petet Eliezer pour al rod en madanm pour Izaak dan en pei ki ti apel Arann. Bann fanmir Abraam ti reste laba Arann.

Eliezer ti al ansanm avek lezot serviter Abraam. Sa vwayaz ti vreman long. Zot ti al avek dis samo ki ti pe anmenn manze ek kado. Me, ki mannyer Eliezer ti pou konnen ki madanm i ti pou swazir pour Izaak? Kan Eliezer ek lezot serviter ti ariv Arann, zot ti aret kot en pwi akoz Eliezer ti konnen ki i ti pou annan dimoun ki ti pou vin la pour vin sers delo. I ti priy Zeova e dir: 'Si mon demann en zenn madanm delo e i donn mwan delo e i donn mon bann samo delo osi, mon pou konnen ki li menm ki ou'n swazir.'



Rebeka ti pare pour travay dir pour al sers delo pour samo

Aprè sa, Rebeka ti vin kot pwi. Labib i dir ki i ti vreman zoli. Ler Eliezer ti demann li en pe delo pour bwar, Rebeka ti dir: 'Byensir. Mon pou donn ou delo epi mon pou al rod ankor pour ou bann samo osi.' Zis mazinè! Ler samo i swaf, i bwar en kantite delo. Savedir Rebeka ti bezwen ale vini en kantite fwa kot pwi. **Eski ou vwar li pe travay dir dan sa portre?**— Eliezer ti vreman sirprann avek lafason ki Zeova ti ekout son lapriyer.

Eliezer ti donn Rebeka en kantite zoli kado. Rebeka ti envit Eliezer ek lezot serviter kot lakour son fanmir. Eliezer ti eksplike akòz Abraam ti'n anvoy li laba e ki mannyer Zeova ti'n reponn son lapriyer. Fanmir Rebeka ti kontan pour les Rebeka marye avek Izaak.

Eski ou krwar Rebeka ti anv marye avek Izaak?— Rebeka ti konnen Zeova ki ti'n anvoy Eliezer kot li. Alor, ler fanmir Rebeka ti demann li si i ti anv al



Kanaan pour marye avek Izaak, i ti dir: 'Wi, mon anv ale.' Deswit apre, i ti al avek Eliezer. Kan zot ti ariv Kanaan, i ti marye avek Izaak.

Vi ki Rebeka ti obei Zeova, Zeova ti beni li. Zezi ti ne dan son fanmir en kantite lannen pli tar! Si ou fer parey Rebeka e fer Zeova kontan, i pou beni ou osi.

KESTYON:

- Lèkel Rebeka?
- Akòz Abraam pa ti oule Izaak i marye avek bann madanm sorti Kanaan?
- Ki mannyer Eliezer ti konnen Rebeka ti sa madanm ki devret marye avek Izaak?
- Ki nou kapab fer pour vin parey Rebeka?

Rebeka ti al Kanaan avek Eliezer e marye avek Izaak



Raab ti krwar dan Zeova

Fer krwar nou dan lavil Zeriko. Sa lavil i Kanaan e i en landrwa kot dimoun pa krwar dan Zeova. En madanm ki apel Raab i reste la.

Ler Raab ti ankor ptipti, i ti tann bann zistwar lo lafason ki Moiz ti separ Lanmer Rouz e tir bann Izraelit Lezip. I ti osi tande ki Zeova ti ed bann Izraelit pour ranport laviktwar ler zot ti lager avek zot lennmi. La aprezan i tande ki bann Izraelit pe kanpe o bor Zeriko.

Sa zour swar, de Izraelit i al Zeriko pour gete ki i annan dan sa lavil. Zot al kot lakaz Raab. Raab i envit zot anndan e dir zot reste. Pandan lannwit, lerwa Zeriko i tande ki sa de espyon i dan lavil e ki zot in al kot lakaz Raab. Alor, lerwa

i anvoy bann dimoun rod sa de zom. Me, Raab i kasyet sa de espyon anler lo trwa son lakaz akoz son twa i plat e i dir bann zom ki lerwa in anvoye: ‘Sa bann espyon pa la, zot in fini kit lavil. Si zot ale la deswit, zot pou kapab zwenn zot!’ **Ou konnen akoz Raab pe protez sa de espyon?**— Akoz i krwar dan Zeova e i konnen ki Zeova pou donn bann Izraelit pei Kanaan.

Avan ki sa de espyon i kit lakaz Raab, zot promet ki li ek son fanmir pou ganny proteze ler lavil Zeriko i ganny detrir. **Eski ou konnen ki zot demann Raab pour fer?**— Zot dir li: ‘Pran sa lakord rouz e met li anpandan par lafnet. Si ou fer sa, tou dimoun ki dan ou lakaz pou ganny proteze.’ Raab i fer sa ki sa de zom i dir li fer. **Eski ou konnen ki arive apre?**—

Detrwa zour pli tar, bann Izraelit i fer letour sa lavil an silans. Pour sis zour, zot mars otour lavil enn fwa par zour. Me son setyenm zour, zot fer letour lavil set fwa. Apre sa, zot kriye byen for. Zeova i fer miray otour sa lavil grennen. Me sa lakaz avek en lakord rouz anpandan par lafnet pa ti grennen! **Eski ou kapab vwar li dan sa portre?**— Raab ek son fanmir i sen e sof!

LIR DAN OU LABIB

Zoÿe 2:1-24;
6:1-5, 14, 15, 20-25
Ebre 11:31



Raab ti protez sa de espyon akoz i ti krwar dan Zeova

Ki ou kapab aprann avek legzanp Raab?— Raab ti krwar dan Zeova akoz tou bann zoli keksoz ki i ti'n tande lo li. Ou osi ou pe aprann en kantite zoli keksoz lo Zeova. **Eski ou krwar dan li parey Raab?**— Nou konnen ou krwar dan li!



Zeova ti sov Raab ek son fanmir

KESTYON:

- Ki zistwar Raab ti tann koz lo la ler i ti ankor ptipti?
- Ki mannyer Raab ti ed de espyon Izraelit? Akoz i ti ed zot?
- Ki sa de zonm ti promet Raab?
- Ki ou kapab aprann avek legzanp Raab?

4

I ti fer son papa ek Zeova kontan

Eski ou vwar sa pti fiy dan sa por-tre?— Son papa i apel Yifta. Labib pa dir nou ki mannyer sa pti fiy i apele, me nou konnen ki i ti fer son papa ek Zeova kontan. Annou koz lo li ek son papa Yifta.

Yifta ti en bon dimoun e i ti pran en kantite letan pour ansenny son fiy lo Zeova. I ti en zom for e en bon sef tou. Alor, bann Izraelit ti demann li pour diriz zot dan zot lager avek zot lennmi.

Yifta ti priy Bondye pour ed zot bat zot lennmi. Yifta ti promet ki si zot ti bat zot lennmi, i ti pou donn Zeova sa premye dimoun ki ti pou sorti kot son lakour pour vin zwenn li ler

Yifta ti koz avek son fiy lo Zeova



Ki promes Yifta pe fer avek Zeova?

LIR DAN OU LABIB

Deterononm 6:4-6

Ziz 11:30-40

1 Korentyen 7:37, 38

i retournen. Sa dimoun ti pou reste e travay tou son lavi kot tabernak Bondye. Tabernak ti en landrwa kot bann dimoun ti al ador Bondye sa letan. Anfet, Yifta ti bat zot lennmi! **Eski ou konnen lekel ki ti sorti premye pour vin zwenn li ler i ti retourn kot li?**—

Wi, fiy Yifta! Son fiy ti son sel zanfan e aprezan Yifta ti pou bezwen les li ale. Yifta ti vreman tris akoz sa. Me, pa oublie, i ti'n fer en promes. Deswit, son fiy ti dir, 'Dadi, ou'n fer en promes avek Zeova, ou bezwen gard ou promes.'

Fiy Yifta osi ti tris. Laba kot tabernak i pa ti pou kapab ni marye, ni annan zanfan. Me i ti vreman anvi gard promes son papa e fer Zeova kontan. Sa ti pli enportan pour li, plito ki marye oubyen annan zanfan. Alor, i ti kit son lakour e al reste kot tabernak pour tou son lavi.

Eski sa ki i ti fer ti fer son papa ek Zeova kontan?— Wi, byensir! Si ou obeisan e ou kontan Zeova parey fiy Yifta, ou osi ou pou fer manmi, dadi ek Zeova kontan en kantite.



I pa ti fasil, me fiy Yifta ti fer sa ki son papa ti'n promet



Sak lannen, bann zanmi fiy Yifta ti vizit li

KESTYON:

- Lekel Yifta? Ki promes i ti fer?
- Akoz i ti difisil pour fiy Yifta fer sa ki son papa ti'n promet?
- Ki fiy Yifta ti anvi fer plis ki tou lezot keksoz?
- Ki mannyer ou kapab fer parey fiy Yifta?

5

Samyel ti kontinyen fer sa ki byen

Depi ki Samyel ti ankor ptipti, i ti reste e travay kot tabernak. Tabernak ti en landrwa kot dimoun ti al ador Zeova. Eski ou konnen akoz Samyel ti al laba? Annou koz en pe lo Ana, manman Samyel.

Pour en kantite letan, Ana ti anvi en pti baba, me i pa ti kapab fer enn. Alor, i ti priy Zeova e sipliy li pour ed li. I ti promet ki si i ti ganny en pti garson, i ti pou anvoy li reste e travay kot tabernak. Zeova ti reponn son lapriyer e i ti ganny en pti garson. I ti apel li Samyel. Zis parey Ana ti'n promet, kan Samyel ti annan trwa-z-an oubyen kat-r-an, Ana ti anmenn li kot tabernak pour servi Bondye.

Eli ki ti gran pret kot tabernak. Sa de garson Eli osi ti travay laba. Pa oublie, tabernak ti landrwa kot dimoun ti ador Bondye e bann dimoun ti devret fer bann bon keksoz laba. Malerezman, bann garson Eli ti pe fer bann move keksoz. Samyel ti vwar sa ki zot ti pe fer. **Eski Samyel ti fer bann move keksoz parey bann garson Eli?**— Non, i ti kontinyen fer sa ki byen zis parey i ti'n aprann avek son paran.

Ki ou krwar Eli ti'n devret fer avek son de garson?— I ti'n devret pini zot. I pa ti'n devret les zot travay kot lakaz Bondye ankor. Me, pa sa ki Eli ti fer, alor Zeova ti ankoler avek Eli ek son de garson. Zeova ti deside pini zot.

En zour swar ler Samyel ti pe dormi, i ti tann en dimoun kriy li: 'Samyel!' I ti tay kot Eli, me Eli ti dir li: 'Mon pa'n kriy ou mwan.' De fwa ankor sa ti arive. Apre trwazyenm fwa, Eli ti dir Samyel si i tann kriy li ankor i devret dir: 'Silvouple Zeova, koze, mon pe ekoute.' Alor sanmenm ki Samyel ti fer. Apre sa, Zeova ti dir Samyel: 'Dir Eli ki mon pou pini son fanmir pour sa bann move keksoz ki zot in fer.' **Eski**

LIR DAN OU LABIB

1 Samyel 2:22-26; 3:1-21

**Samyel ti dir Eli sa ki
Zeova ti'n dir**

ou krwar i ti fasil pour Samyel dir Eli sa?— Non, i pa ti fasil. Me, menm si Samyel ti per, i ti fer sa ki Zeova ti dir li. Sa ki Zeova ti dir ti arive. Sa de garson Eli ti ganny touye e Eli osi ti mor.

Samyel i en bon legzanp pour nou. I ti fer sa ki byen, menm si i ti vwar lezot dimoun pe fer sa ki mal. Be ou? Eski ou pou parey Samyel e kontinyen fer sa ki byen? Si wi, ou pou fer Zeova ek manmi ek dadi kontan.



KESTYON:

- Ki promes manman Samyel ti fer?
- Ki Samyel ti vwar bann garson Eli pe fer kot tabernak?
- Ki Zeova ti demann Samyel pour fer?
- Akoz Samyel i en bon legzanp pour nou?

Ki ou fer ler ou per?— Petet ou tay kot manmi ouswa dadi pour protez ou. Me, i annan en lot dimoun ki kapab protez ou tou. I pli for ki nenport ki. **Eski ou konnen lekel?**— Wi, Zeova. Annou koz lo en zenn garson dan Labib ki ti apel David. I ti konnen ki Zeova ti pou touzour ed li, alor i pa ti per.

Depi ler David ti ankor en pti baba, son paran ti koz avek li lo Zeova. Sa ti ed David pour pa per menm ler ser-ten keksoz efreyan ti ariv li. I ti konnen ki Zeova ti son Zanmi e I ti pou ed li. En fwa, kan David ti pe pran swen avek son bann mouton, en gro manman lyon ti vini e pran en mouton dan

son labous! Eski ou konnen ki David ti fer? I ti tay deryer sa lyon e i ti touy li avek son de lanmen! Pli tar, ler en lours ti atak bann mouton, David ti touy li osi ou konnen! **Lekel ki ti pe ed David?**— Wi, se Zeova.

En lot fwa osi David ti vreman brav. Bann Izraelit ti pe lager avek en pep ki ti apel bann Filisten. Enn parmi bann solda Filisten ti vreman, vreman gran. I ti en zean! I ti apel Golyat. Sa zean ti pe sikann bann solda Izraelit ek Zeova. Golyat ti dir bann solda Izraelit vin lager avek li. Me tou bann Izraelit ti tro per pour lager avek li. Alor, kan David ti tann sa, i ti dir Golyat: ‘Mwan mon pou lager avek ou! Zeova pou ed mwan e mon pou bat ou!’ **Eski ou krwar David ti brav?**— Wi, i ti vreman brav. Eski ou anvi konnen ki ti arive apre?

David ti pran son fles ek senk pti ros e al lager avek sa zean. Kan sa zean ti remarke ki David ti zis en zenn garson, i ti sikann li. Me David ti dir li: ‘Ou’n vin kot mwan avek en lepe, me mwan mon pe vin kot ou avek non Zeova!’ Apre sa, i ti met en ros dan son fles, i ti tay ver Golyat e balans li direk lo Golyat. Sa ros ti tap Golyat drwat lo son fron ant son de lizye!

LIR DAN OU LABIB

Psonm 56:3, 4
1 Samyel 17:20-54



David pa ti per akoz i ti konnen Zeova ti pou ed li

Sa zean ti tonm ater e mor! Bann Filisten ti telman per ki zot tou zot ti taye lake lo ledo. **Ki mannyer en zenn garson parey David ti kapab touy en zean?**— Zeova ti ed li e Zeova ti pli for ki sa zean, pa i vre!

Ki ou aprann avek zistwar David?— Zeova i pli for ki nenport ki. Zeova i ou Zanmi osi. Alor, laprosenn fwa ki ou per, pa oublie ki Zeova i kapab ed ou pour vin brav!

KESTYON:

- Ki David ti fer ler en lyon ek en lours ti atak son bann mouton?
- Ler Golyat ti sikann Zeova, ki David ti dir li?
- Ki mannyer David ti bat Golyat?
- Akoz David pa ti per sa lyon, sa lours ek sa zean?
- Ki nou aprann avek zistwar David?

Eski par ler ou santi ou tousel e ou per?

Ki manner ou krwar i pe santi li?

Get sa pti garson lo sa portre. I paret ki i tousel e i per, non? **Eski ou'n deza santi koumsa ou?**— Tou dimoun i santi koumsa par ler. Labib i koz lo bann zanmi Zeova ki ti santi zot tousel e per. Eliya ti enn parmi zot. Annou koz lo li.

Eliya ti reste Izrael en bann letan pase, avan ki Zezi ti ne. Aab, lerwa Izrael pa ti pe ador Zeova sa vre Bondye. Aab ek son madanm Zezabel ti pe ador Baal, en fo bondye. Alor, lapli par dimoun Izrael osi ti konmans ador Baal. Larenn Zezabel ti pa bon e i ti anv touy tou bann dimoun ki ti ador Zeova. I ti anv touy Eliya tou. **Eski ou konnen ki Eliya ti fer?**—

Eliya ti sove. I ti al dan dezer e kasyet dan en kavern ros. **Akoz i ti fer sa?**—

Zezabel ti anv touy Eliya

LIR DAN OU LABIB

1 Lerwa 19:3-18

Psonm 145:18

1 Pyer 5:9

Wi, akoz i ti per. Me, Eliya pa ti devret per. Akoz? Parski i ti konnen Zeova ti kapab ed li. Zeova ti'n montre Eliya ki i ti vreman for avan sa. En fwa, Zeova ti reponn lapriyer Eliya par fer dife desann sorti dan lesyel. Alor, sirman Zeova ti pou'n kapab ed Eliya la osi!

Laba dan sa kavern ros, Zeova ti koz avek li e demann li: 'Ki ou pe fer la?' Eliya ti reponn: 'Zis mwan tousel ki ankor pe ador ou. Mwan mon tousel e mon per ki mon pou ganny touye.' Eliya ti krwar ki tou lezot adorater Zeova ti'n ganny touye. Me Zeova ti dir Eliya: 'Non, pa vre sa. I annan 7,000 lezot dimoun osi ki ankor pe ador mwan. Fodre ou brav. Mon annan ankor travay pour donn ou!' **Eski Eliya ti kontan pour tann sa?—**

Ki ou kapab aprann avek sa ki ti ariv Eliya?— Ou pa devret zanmen santi ou tousel e per. Ou annan bann zanmi ki kontan Zeova e ki kontan ou. Deplis, Zeova i vreman for e i pou touzour ed ou! **Eski ou kontan pour konnen ki ou pa zanmen tousel?—**

KESTYON:

- Dan letan Eliya, eski lamazorite dimoun Izrael ti ador Zeova? Lekel zot ti adore?
- Akoz Eliya ti sove e kasyet dan en kavern ros?
- Ki Zeova ti dir Eliya?
- Ki nou kapab aprann avek sa ki ti ariv Eliya?



**Ki mannyer
Zeova ti ed Eliya?**



Yosiya ti annan bann bon zanmi

Eski i difisil pour fer sa ki byen?— Bokou dimoun i krwar sa. Labib i dir nou ki i ti vreman difisil pour en garson ki ti apel Yosiya fer sa ki byen. Me i ti annan bann bon zanmi ki ti ed li. Annou koz plis lo Yosiya ek son bann zanmi.


Papa Yosiya ti apel Amonn, en lerwa Zida. Amonn ti pa bon e i ti ador zidol. Kan papa Yosiya ti mor, Yosiya ti vin lerwa Zida. I ti annan zis wit an!

Eski ou krwar ki i ti pa bon parey son papa?— Non, i pa ti parey li!

Menm ler i ti ankor byen zenn, Yosiya ti anvi obeir Zeova. Alor, i ti fer zanmi avek bann dimoun ki ti kontan Zeo-

va. Zot ti ed Yosiya pour fer sa ki byen. Lekel bann zanmi Yosiya?

Enn son zanmi ti apel Tsefanya. Tsefanya ti en profet ki ti dir pep Zida ki si zot ti ador zidol, bann move keksoz ti



Tsefanya ti dir bann dimoun pa bezwen ador zidol

LIR DAN OU LABIB

2 Kronik 33:21-25;
34:1, 2; 35:25

pou ariv zot. Yosiya ti ekout Tsefanya e ador Zeova plito ki ador zidol.

En lot zanmi Yosiya ti apel Zeremi. I ti preski menm laz avek Yosiya e zot ti reste pros avek kanmarad ler zot ti pe grandi. Zot ti telman de bon zanmi ki ler Yosiya ti mor, Zeremi ti ekrir en zoli sanson lo kantite ki i ti mank Yosiya. Zeremi ek Yosiya ti ed kanmarad pour fer sa ki byen e pour obei Zeova.

Ki ou kapab aprann avek legzanp Yosiya?— Menm ler Yosiya ti ankor en pti garson, i ti anv fer sa ki byen. I ti konnen ki i ti devret zanmi avek bann dimoun ki kontan Zeova. Fer sir ki ou fer zanmi avek bann dimoun ki kontan Zeova, bann dimoun ki pou ed ou pour fer sa ki byen!



Yosiya ek Zeremi ti ed kanmarad pour fer sa ki byen

KESTYON:

- Lelkel papa Yosiya? Eski i ti fer sa ki byen?
- Ki Yosiya ti anv fer menm letan i ti ankor en pti garson?
- Ki mannyer de zanmi Yosiya ti apele?
- Ki ou kapab aprann avek legzanp Yosiya?

Zeremi pa ti aret koz lo Zeova


Par ler dimoun i sikann nou ouswa ankoler avek nou kan nou koz avek zot lo Zeova. Sa i kapab fer nou anvi aret koz lo Bondye. **Eski ou'n deza santi koum-sa?**— Labib i koz lo en zenn onm ki ti kontan Zeova me ki ti pros pour aret koz lo li. I ti apel Zeremi. Annou koz plis lo li.

Kan Zeremi ti en zenn onm, Zeova ti dir li al dir son pep aret fer sa ki mal. I ti difisil pour Zeremi fer sa e i ti per. I ti dir Zeova: 'Mon pa konnen ki pour dir. Mon tro zenn.' Me, Zeova ti dir: 'Pa bezwen per. Mon pou ed ou.'

Alor, Zeremi ti konmans dir son pep ki zot pou ganny pini si zot pa sanze.

LIR DAN OU LABIB

Zeremi 1:4-8; 20:7-9;
26:8-19, 24; 38:6-13




Akoz sa bann dimoun i ankoler avek Zeremi?

Eski sa pep ti fer sa ki Zeremi ti dir?— Non. Zot ti sikann li ouswa ankoler avek li. Serten ti menm anvi touy li! **Ki mannyer Zeremi ti santi li?**— I ti per e i ti dir: ‘Mon pa pou koz ankor lo Zeova.’ **Me eski vreman i ti arete?**— Non, i pa ti arete. I ti telman kontan Zeova ki i pa ti kapab aret koz lo li. Vi ki Zeremi pa ti aret koz lo li, Zeova ti protez li.

Par egzanp, en fwa, bann zonm vreman pa bon ti zet Zeremi dan en gran trou ranpli avek labou. I ti napa ni delo pour bwar, ni manze pour manze. Sa bann zonm ti anvi kit Zeremi laba pour li mor. Me i ti reisi sove avek led Zeova!

Ki nou kapab aprann avek legzanp Zeremi?— Menm si i ti per par ler, i pa ti aret koz lo Zeova. Kan ou koz lo Zeova, dimoun i kapab sikann ou oubyen ankoler avek ou. Petet ou kapab santi ou kanmi ouswa per. Me, pa zanmen aret koz lo Zeova. I pou touzour ed ou parey i ti fer pour Zeremi.



Zeova ti sov Zeremi

KESTYON:

- Ki Zeova ti dir Zeremi fer?
- Akoz Zeremi ti pros pour aret koz lo Zeova?
- Ki mannyer Zeova ti ed Zeremi?
- Ki ou’n aprann avek legzanp Zeremi?

Eski i touzour fasil pour obei manmi ek dadi?— Par ler i difisil. **Eski ou ti konnen ki Zezi ti obei Zeova e osi son paran?—** Son legzanp i kapab ed ou pour obei manmi ek dadi menm kan i pa fasil. Annou koz plis lo la.

Avan ki Zezi ti vin lo later, i ti dan lesyel avek son Papa, Zeova. Me Zezi ti osi annan paran lo later. Zot ti apel Zozef ek Mari. **Eski ou konnen ki mannyer zot ti vin son paran?—**

Zeova ti pran Zezi dan lesyel e met li dan vant Mari pour ki Zezi i kapab ne e viv lo later. Sa ti en mirak! Zezi ti grosi dan vant Mari parey tou pti baba

i grosi dan vant zot manman. Apepre nef mwan pli tar, Zezi ti ne. Koumsanmenm ki Mari ek son msye Zozef ti vin paran Zezi lo later.

Kan Zezi ti annan 12 an, i ti fer en keksoz ki montre ki kantite i ti kontan son Papa Zeova. Sa ti arive ler Zezi ek son fanmir ti fer en gran vwayaz pour al Lapak Zerizalenm. Ler zot ti pe retournen, Zozef ek Mari pa ti trouv Zezi okenn par. **Eski ou konnen kote i ti ete?—**

Zozef ek Mari ti depese pour retourn Zerizalenm e zot ti rod Zezi partou. Zot ti vreman enkyet akoz zot pa ti kapab vwar li. Me apre trwa zour, zot ti vwar li dan tanp! **Eski ou konnen akoz Zezi ti dan tanp?—** Parski i ti anv i konn plis lo son Papa Zeova. I ti kontan Zeova e i ti anv konnen konman pour fer li plezir. Menm ler i ti vin gran, Zezi ti touzour obei Zeova. I ti obei menm ler i ti difisil e i ti bezwen soufer pour obei Zeova. **Eski Zezi ti osi obei Zozef ek Mari?—** Wi, Labib i dir ki i ti obei zot.


Ki ou kapab aprann avek legzanp Zezi?— Ou bezwen obei manmi ek dadi, menm ler i pa fasil. **Eski ou pou fer sa?—**

LIR DAN OU LABIB

Lik 1:30-35; 2:45-52

Efezyen 6:1

Ebre 5:8




Akoz Zezi ti kot tanp?

KESTYON:

- Ki mannyer Zozef ek Mari ti vin paran Zezi lo later?
- Kan paran Zezi ti rod li Zerizalenm, kote zot ti vwar li?
- Ki ou kapab aprann avek legzanp Zezi?

Zot ti ekri lo Zezi



Ki ou konnen lo sa bann zom?

Eski ou vwar sa bann zom dan sa portre?— Zot apel Matye, Mark, Lik, Zan, Pyer, Zak, Zid ek Pol. Sa bann zom ti viv dan menm lepok ki Zezi e zot ti ekri lo Zezi. Annou koz plis lo zot.

Trwa parmi zot ti bann zapot ki ti pres ansanm avek Zezi. Eski ou konnen lekel sa trwa?— Matye, Zan ek Pyer. Matye ek Zan ti bann zapot ki ti konn Zezi tre byen e zot tou le de zot ti ekri en



liv lo lavi Zezi. Zapot Zan ti osi ekri en liv ki apel Revelasyon e trwa let ki apel Premye Zan, Dezyenm Zan ek Trwazyenm Zan. Zapot **Pyer** ti ekri de let ki dan Labib. Sa de let i apel Premye Pyer ek Dezyenm Pyer. Dan son dezyenm let, Pyer ti ekri konsernan sa letan ler Zeova ti koze dan lesyel e dir sa lo Zezi: 'Sa i mon garson. Mon kontan li e mon fyer aköz li.'


Lezot zonm dan sa portre osi ti koz lo Zezi dan bann liv ki zot ti ekri. Enn parmi zot ti apel **Mark**. Manke i ti la ler Zezi ti ganny arete e i ti vwar tou sa ki ti arive. En lot i apel **Lik**. I ti en dokter e petet i ti vin en Kretyen apre lanmor Zezi.

De lezot ekriven Labib ki ou vwar dan sa portre ti bann pti frer Zezi. **Eski ou konnen ki mannyer zot apele?**— Zot apel **Zak** ek **Zid**. Premye kou, zot pa ti krwar dan Zezi. Zot ti menm krwar ki i ti en pti pe fou fou. Me pli tar zot ti krwar dan Zezi e vin Kretyen.

Deryen ekriven Labib ki ou vwar dan sa portre se **Pol**. Avan ki i ti vin

en Kretyen, i ti apel Sol. I pa ti kontan bann Kretyen e i ti fer zot mizer. **Eski ou konnen kwa ki ti fer Pol anvi vin en Kretyen?**— En zour, Pol ti pe vwayaze lo semen kan en sel kou i ti tann en lavwa dan lesyel koz avek li. I ti Zezi sa! I ti demann Pol: 'Akoz ou fer martir bann ki krwar dan mwan?' Apre sa, Pol ti sanze e vin en Kretyen. Pol ti ekri 14 liv Labib, depi Romen ziska Ebre.

Nou lir Labib sak zour nou, pa i vre?— Ler nou lir Labib, nou aprann en kantite keksoz lo Zezi. **Eski ou ti a kontan konn plis lo Zezi?**—



KESTYON:

- Ki zapot Zezi ki ti ekri lo son lavi?
- Lekel sa de ekriven Labib ki ti frer Zezi?
- Ki mannyer Pol ti vin en Kretyen?

Annou koz lo en zenn onm ki ti sov lavi son tonton. Pol ti tonton sa zenn onm. Nou pa konn non sa zenn onm, me nou konnen i ti fer en keksoz vremen brav. **Eski ou anvi konnen ki i ti fer?—**

Pol ti dan prizon Zerizalenm. I ti'n ganny arete aköz i ti pe koz lo Zezi. Serten zonm vremen pa bon ti ay Pol, alor zot ti fer en plan pour touy li. Zot ti dir: 'Annou demann zofisye larme pour fer bann solda anmenn Pol ankour. Nou ava kasyet dan semen e ler Pol ava pase nou ava touy li!'

Neve Pol ti tann koz lo sa plan. Ki i ti fer? I ti al kot prizon e dir Pol sa ki i ti'n tande. Deswit, Pol ti dir li dir sa zofisye larme konsernan sa plan. **Eski i ti fasil pour neve Pol koz avek sa zofisye larme?—** Non, aköz sa zofisye ti en dimoun enportan. Me, neve Pol ti brav e i ti koz avek sa zofisye larme.

Sa zofisye ti konn egzakteman ki pour fer. I ti swazir preski 500 solda pour protez Pol. I ti dir zot anmenn Pol Sezare sa menm zour swar. **Eski Pol ti reisi sove?—** Wi, sa bann zonm pa bon pa ti kapab atak li. Zot plan ti tonm dan delo.

Ki ou kapab aprann avek sa zistwar?— Ou osi ou kapab vin brav parey neve Pol. Nou bezwen brav kan nou koz avek lezot lo Zeova. **Eski ou pou brav e kontinyen koz lo Zeova?—** Si ou fer sa, ou kapab sov lavi en dimoun.

LIR DAN OU LABIB

Akt 23:12-24

Matye 24:14; 28:18-20

1 Timote 4:16



Neve Pol ti dir Pol ek sa zofisye larme sa plan pour touy Pol



KESTYON:

- Ki serten zonn pa bon ti anv fer avek Pol?
- Ki neve Pol ti fer? Akoz sa ki i ti fer ti brav?
- Ki mannyer ou kapab brav parey neve Pol?

Timote ti anvi ed dimoun

Timote ti en zenn onm ki ti kontan ed dimoun. I ti al en kantite landrwa pour ed lezot. Akoz sa, son lavi ti gou. **Eski ou ti a kontan konn plis lo li?**—

Timote ti grandi dan en lavil ki ti apel Lis. Ler i ti ankor ptipti, son granmanman Lois ek son Manman Enis ti

konmans ansenny li lo Zeova. Anmezir Timote ti grandi, i ti anvi ed lezot konn Zeova.

Ler Timote ti ankor zenn, Pol ti demann li pour vwayaz avek li pour ki zot pres dan lezot landrwa osi. Timote ti dir: 'Wi!' I ti pare pour li ale e ed lezot.

Manman ek granmanman Timote ti ansenny li lo Zeova




Timote ti al avek Pol dan en lavil Masedwann ki ti apel Tesalonik. Pour zot ariv laba, zot ti bezwen mars en gran zistans e apre pran en bato. Ler zot ti finalman arive, zot ti ed en kantite dimoun konn Zeova. Me serten dimoun ti ankoler e ti esey fer zot ditor. Alor Pol ek Timote ti bezwen kit sa landrwa e al pres dan lezot landrwa.

Detrwa mwan pli tar, Pol ti demann Timote pour retourn Tesalonik pour vwar ki mannyer bann frer ek ser ti ete laba. I ti bezwen annan en kantite kouraz pour li retourn dan sa lavil danzere! Me Timote ti ale aköz i ti enkyet pour bann frer ek ser laba. I ti retourn kot Pol avek bon nouvel. Bann frer ek ser Tesalonik ti byen!

Timote ti travay avek Pol pour plizyer lannen. En fwa Pol ti ekri ki Timote ti sa pli bon dimoun ki i ti kapab anvoye pour ed bann kongregasyon. Timote ti kontan Zeova ek bann dimoun.

Eski ou kontan lezot e anv i ed zot konn Zeova?— Si wi, ou lavi i kapab gou, parey pour Timote.

Timote ti annan en lavi gou



LIR DAN OU LABIB

2 Timote 1:5; 3:15

Akt 16:1-5; 17:1-10

1 Tesalonisyen 3:2-7

Filipyen 2:19-22

KESTYON:

- Kote Timote ti grandi?
- Eski Timote ti anv vwayaz avek Pol? Aköz?
- Aköz Timote ti retourn Tesalonik?
- Parey Timote, ki ou kapab fer pour ou lavi gou?

En Rwayonm ki pou diriz later antye



Eski ou konnen ki Rwayonm nou pe koz lo la?— Wi, Rwayonm Bondye. Se sa Rwayonm ki pou fer later antye vin en paradi. **Eski ou ti a kontan konn plis lo sa Rwayonm?**—

Tou Rwayonm i annan en lerwa. Sa lerwa i diriz bann dimoun dan son pei. **Eski ou konnen lekel sa Lerwa dan Rwayonm Bondye?**— Zezi Kri. I reste dan le-syel. Byento i pou vin Lerwa **tou dimoun lo later!** **Eski nou pou kontan ler Zezi pou Lerwa later antye?**—

Nou pou vreman kontan! Dan Paradi, dimoun pa pou lager, ni al lager. Tou dimoun pou kontan kanmarad. Personn pa pou malad ouswa mor. Bann ki pa vwar kler pou kapab vwar kler, bann ki sourd pou tande e sa bann ki pa kapab marse pou taye e sotaye. Tou dimoun pou annan ase manze. Bann zannimo pou vin zanmi avek kanmarad e avek nou. Bann dimoun ki'n mor pou resiste. En kantite zonn ek madanm ki nou'n koz lo la dan sa pti liv parey Rebeka,



Ki ou ti a kontan vwar dan Paradi?

Raab, David ek Eliya pou resisite. **Eski ou ti a kontan zwenn zot ler zot resisite?**—

Zeova i kontan ou e i anv i ki ou lavi i gou. Si ou kontinyen aprann konn Zeova e obeir li, ou pou kapab viv pour touzour dan en zoli paradi! **Eski se sa ki ou anv i?**—

LIR DAN OU LABIB

Izai 2:4; 11:6-9; 25:8;

33:24; 35:5, 6

Zan 5:28, 29; 17:2, 3

KESTYON:

- Lekel ki Lerwa dan Rwayonm Bondye?
- Zezi pou vin Lerwa lekel?
- Ki manyer lavi pou ete ler Zezi pou diriz later?
- Si ou anv i viv pour touzour dan Paradi, ki ou bezwen fer?



©2014

Watch Tower Bible and Tract Society of Pennsylvania

Ansenny ou zanfán

Editer

Watchtower Bible and Tract Society of Britain.

The Ridgeway, London NW7 1RN.

Enprimen Novanm 2013

Nou pa vann sa pti liv me i ganny servi dan sa travay mondyal pour ansenny dimoun lo Labib e i ganny soutenir par kontribisyon volonter.

Eksepte kan i endike, bann sitasyon Lekritir Ebre in ganny tradwir apartir *New World Translation of the Holy Scriptures* an Angle e bann referans dan Lekritir Grek in ganny tire dan *Nouvo Testaman* an Kreol Seselwa.

Teach Your Children

Seychelles Creole (yc-SC)

Made in Britain



yc-SC
140521